

quadriennium rei ac fidei Christianæ excolendæ, quam potui, navavi operam, nec in urbe modo ista, sed & in vicinis civitatibus non exiguos relinquere coactus sum Christianis sacris initiatorum greges; à quibus ut ægre & invitus sum avulsus, ita faxit Deus, ut brevi ad meos una cum sociis, ac multiplici fœnore salvus & incolumis reverti possim.

*Nomina antiqua.*

Priscis temporibus hæc regio ad U Reges pertinuit, mox Jue, paulo post Çu Reges occuparunt, Chin Cientang dixit, Suius primum vocavit Hangcheu, Tanga familia Juhang, Sunga Linga, Taiminga iterum Hangcheu: præest civitatibus octo, 1 Hangcheu, 2 Haining, 3 Fuyang, 4 Juhang, 5 Linga, 6 Yucien, 7 Sinching, 8 Changhoa.

In hac regione ubique fere tigrides adsunt, quas Marcus Paulus Venetus leones forte per catachresim appellavit.

*Montes.*

Funghoang mons ad urbis Australem partem est, in quo duo altissimi sunt vertices ex adverso sibi oppositi, tantæ altitudinis, ut cœlum ipsum contingere videantur, in utroque tamen idolorum fanum est, & turris novizonia.

Xeceng mons in Boreali ripa Si lacus, in quo turris magnifica est, & idolorum fanum.

Tienmo mons circa Linga incipit, est ex laudatis apud Sinas ordine trigessimus quartus, ingens omnino ac præruptus, sylvæ in illo sunt complures, amœni in vallibus oryza campi; ex eo infinita vis fungorum per totam Sinam deferretur, quos sale conditos exsiccant, ac per totum annum servant, cumque eos coquere desiderant, prius aliquamdiu aqua macerant, atque ita denuo quasi recentes evadunt.

*Fungi Sinici.*

Mons hic ad octingenta stadia excurrit, dicitur Tienmo, hoc est cœli oculus, eo quod in duobus verticibus duos habeat lacus, quos oculos, quibus cœlum aspicit, vocant.

Cienking mons prope Changhoa est, in quo lacus non admodum magnus ducenta terræ jugera occupat, ex eo celebris, quod aureolos illos pisciculos proferat, quos Sinæ Kinyú vocant ex re indito nomine. fulvi enim sunt coloris, certisque intervallis aureis quodammodo lineis intersecta cutis micat, totumque dorsum aureo veluti pulvere inspersum est, eorum magnitudo digitum non excedit, & tamen trifurcata, bifurcata, subinde etiam simplici & latiore cauda armati sunt, unde jucundi amœnique sunt aspectu, magno apud Sina, sunt in pretio

*Pisculi aurei.*

eosque studiose domi, aut in viridariis alunt pulcherrimis ad id adornatis vasis, iis subinde magnates manu sua cibum porrigere sunt soliti, ac quasi nossent, cui domino serviant, quamque suo conspectu voluptatem illi concilient, sæpe, cum adest, collidunt. Cum ex omnibus partibus, quas Sinæ expetunt, perfecti sunt, unius pretium ad duos tresve aures quandoque ascendit.

Tiencho mons versus urbis occasum partim horridior, partim amœnus, collis illius quidam Filaifung dictus totus saxeus est, intusque cavernosus, in eo sunt splendida idolorum fana, ac cœnobia, ac supra tria sacrificulorum millia in iis degere feruntur, ex his quamplurimi perpetuo ac voluntario carcere adstricti cavernas inhabitant, quibus reliqui cibum subministrant, quem anachoretæ illi funi alligatum sursum adducunt, cum ad ipsas cavernas ascensus vix, ac ne vix quidem pateat. Eodem fere modo ab accedentibus spectatoribus stipem accipiunt, sæpeque sat lautam, hic enim locus toto anno ac præcipue mense Mayo frequentatur ab advenis ac hospitibus Sinis, quos credula superstitio eo allicit. Filaifung collis dicitur, quod volando venire significat, nomine ab Indo quodam sacrificulo desumpto, qui cum primum illum vidit, dixisse fertur hic collis est, quem in India desideramus, huc profecto advolavit.

Si lacus celebris, qui lætitia indigenas & advenas beat, is primum hic sibi locum vendicat, quod in ejus orientali ripa urbs ipsa jaceat: relicta tantum viâ strata lapidibus septem stadia longâ lacum inter & mœnia commodissima ad deambulationem: lacus totus quadraginta stadia suo ambitu complectitur, undique vel mœnibus vel montibus cinctus instar amœnissimi theatri, ex quibus rivuli quidam ignobiles suo quique alveolo distincti delabuntur, circum ipsos montes, fana, palatia, cœnobia, Musæa, sylvæ, sepulchra hortique amœnissimi spectantur; ripæ lacus latissimis viis stratae quadratis lapidibus, atque intra ipsum lacum viæ ex eodem deductæ sunt relictis pontibus ad transitum navium, ita ut totus lacus etiam pedestri itinere lustrari possit. Vias hæc utrimque arbores ad lineam collocatæ inumbant, persicorum pomorum vel salicum sunt, ubique podia, meniana, similiaque pro deambulantium commodo continent: nescias sane, quid prius in illo laudes, naturæ an artis, quæ naturæ opus auxit aut superavit potius, miram elegantiam: aqua tota

*Flumina.*

*Lacus amœnissimus.*